



Sulle joka saat vaksiinin covid-19 vasten

Sulla, jollekko tarjotaan vaksinasuunia covid-19 vasten, on piiaim kysymyksiä ennen sinun päätöstä. Tämä informasuuni saattaa olla tuki sulle vaksinasuunia ennen, sen aikana ja jälkhiin sen.

Tautia covid-19 aiheuttaa viirys. Usseimat jotka saavat tautin covid-19 tulevat lievästi saihraaksi, mutta jokku tulevat vakavasti saihraaksi. Pahhiimassa taphauksessa sitä saattaa kuolla tauista.

Vaksinasuuni suojaa sinua ja muita

Vaksinasuuni covid-19 vasten saattaa suojata sinua saamasta tautia, ja se vähentää kansa riskiä ette sie tartutat muita. Aijan olhoon tartunan leviämistä saatethaan topata.

Kelles vaksinasuunia tarjotaan?

Justhiins nyt vaksinasuunia covid-19 vasten tarjotaan henkilöile jotka oon 18 vuotta ja vanheemat, Kansanterhveysviraston rekomentasuunnitten mukhaan. Vaksiini tarjotaan ensinä niile jollako oon suuriin riski tulla vakavasti saihraaksi.

Intivityelliä arviointia saatethaan tarttea

Aluksi vaksinasuunia ei tarjota henkilöile jotka oon 17 vuotta elikkä nuoremat elikkä henkilöile jotka oon raskhaana. Tilane saattaa kuitenkin muuttua sen mukhaan ko tieto lissäintyy. Riippuen vaksiinista ja yksityisen henkilön perusongelmasta, vaksinasuunista mennee erityisissä taphauksissa keskustella käsittelevän lääkärin kansa.

Riski ette sairastua vakavasti lissäintyy iän mukhaan

Riski ette sie sairastut vakavasti covid-19:sta lissäintyy mitä vanheempi sie olet, olletikki jos sie olet 70 vuotta elikkä vanheempi. Sitä paitti henkilöilä, joilako oon vissiä saihrauksia, oon suurempi riski ko muila ette saaja vakavan covid-19, riippumatta ikkää.

Ennen vaksinasuunia

Vaksinasuuni covid-19 vasten oon vapaahtonen.

Sie, joka halvaat tietää lissää ennen vaksinasuunin päätöstä, löyät faktaa ja informasuunia 1177, Kansanterhveysvirastolla ja Lääkevirastolla. Katto kontaktitietoja ensi sivula.

Näin vaksinasuuni tehhään

Ennen vaksinasuunia sie täytät terhveysdeklarasuunin.

Saihraanhoitaja antaa sulle vaksiinin pruutala käsivartheen. Jos sinua tarttee vaksineerata kaks kertaa sie saat saman sorttisen vaksiinin molemilla kertoina.

Pistoksen jälkhiin se oon tavalista ette käsivarressa oon vähän kipua, se punehtuu, paisuu elikkä kutisee. Jokku saattavat saaja lyhyaikhaisen kuuheen, päänsärjyn ja ylheisen saihrauentuntheen. Nämät oon luonoliset reaksuunit kropan imynisuojassa. Oihreet oon usseimiten lieviä ja menevät yli jonku päivän päästä. Alerkiset reaksuunit oon kauhean harvinhaiset.

Jälkhiin vaksinasuunin

Jos sie voit huonosti elikkä olet kiusoissa vaksinasuunin jälkhiin sie piät ottaa yhteyttä saihraanhoijon kansa ette sinun oihreet tutkithaan, riippumatta jos net liittyvät vaksinasuuhniin elikkä ei.

Saihraanhoito pittää ilmottaa eppäiltyjä sivuvaikutuksia Lääkevirasthoon. Jos sie koet sivuvaikutuksia vaksinasuunin jälkhiin sie saatat kansa itte ilmottaa net osotheela: www.lakemedelsverket.se/rapportera.

Antaa suojan vakavaa tautia vasten

Vaksinasuunin jälkhiin kropan imynisuoja antaa suojan covid-19 vasten. Se ei ole kuitenkhaan varma ette kaikin joitako vaksineerathan saavat kokohnaisen suojan. Tämä jällaa kaikile vaksiinile, ei vain covid-19 vasten. Mutta sulla oon kuitenkin pienempi riski sairastua vakavasti.

Viimisen annoksen jälkeksi se mennee viikko ennen ko suoja oon täyelinen

Riippuen mitä vaksiiniä käytethään se tarvithaan eri määrä annoksia ette saaja hyvän suojan. Nyt tarvithaan kaks annosta. Se viipyy suunile viikon viimisen annoksen jälkeksi ennen ko kroppa oon saanu täyelinen suojan.

Sulle joka annat tukea omhaiselle vaksinasuunin päätöksessä

Sie joka annat tukea likhiiselle omhaiselle vaksinasuunin päätöksessä saatat tarvita puhua lääkärin elikkä saihraanhoitajan kansa jos oon kysymyksiä. Tämä jällaa erityisesti jos sinun omhaisella helpola vuotaa veri, oon takanaolevia saihrauksia elikkä käyttää lääkheitä jotka vaikuttavat imynisuohjaan.

Lissää tauista covid-19

Covid-19:in oihreet vaihtelevat. Usseimiten net oon saman sorttiset ko kovan yskän elikkä flunsainfeksuunin. Kuume ja yskiminen oon tavalisimat oihreet mutta yks elikkä useat seuraavista oihreista saattavat kansa essiintyä: hengitysvaikeukset, nuha, tukossa nokka, kurkkukipu, päänsärky, pahavointi, löysilä vatta, prippuja ihossa, kaonu elikkä huonompi maku, lihaksitten ja nivelitten särkyä.

Kansalinen vaksinasuunirekisteri

Kaikki covid-19 vaksinasuunit pittää rekistrearata kansalisesa vaksinasuunirekisterissä. Se informasuuni mitä rekistrearathan oon henkilönumero elikkä järjestysnumero, vaksiinin päivämäärä, mitä vaksiiniä oon käytetty, satsinnumero, hoijonantaja joka oon vastuulinen vaksinasuunista, annosnumero covid-19:ille.

Tämä tehään ette saatethaan seurata ylös vaksinasuunit. Tietoja suojaa ehton salhaisuus eikä siiheen pääse potilasjournalin kautta. Sulla oon oikeus vaatia ulos tiot Taattasuojelulain mukhaan (GDPR).

Tuotantoinformasuuni vaksiinistä

Sie löyät aktyellin informasuunin vaksiinistä jonka sie saat tikitaalissa muotossa Lääkheenviraston/ Läkemedelsverkets vebbipaikalta. Sie saatat kirjottaa ulos informasuunin elikkä lukea suohraan vebbipaikala.

Jatka suojaamasta itteä ja muita

Sie joka olet saanu vaksiinin tarttet kuitenki jatkaa seuraahmaan rekomentasuunia ette topata tartunanleviämistä.

Seuraa kehitystä ja jatka

- jäähmään kotia jos sie olet sairas
- pitähmään väliä muihiin ihmishiin
- pesehmään käsiä useasti.

Lissää informasuunia ja kontaktitietoja

Informasuunia mikä jällaa sinua, missä sie asut:

- 1177 Hoito-opas – [1177.se](https://www.1177.se)

Rekomentasuunia vaksinasuunile ja ette välttää tartunan leviämistä:

- Kansanterhveysvirasto – [folkhalsomyndigheten.se](https://www.folkhalsomyndigheten.se)

Vaksiini covid-19 vasten:

- Lääkheenvirasto – [lakemedelsverket.se/coronavaccin](https://www.lakemedelsverket.se/coronavaccin)
- Lääkheentieto, tel 0771-46 70 10

Vastauksia ylheishiin kysymykshiin covid-19:sta asukhaile:

- [krisinformation.se](https://www.krisinformation.se)
- 113 13 – kansalinen informasuuninnumero